

Mbanjlungjduih:

Aenmbanj Siujgangh Fouqmiz Vwnzmingz Diegbya

大石山富裕文明的小康村

□ Youbeuz ingj

Aenmbanj ndaw rungh bienq yiengh moq.



▲ Byaij haeuj mbanj gingj gyaeunde.



▲ Cingsaenz haenqrenz buek guh daihdaih cienz.



▲ Lungjduih Minzcuz Bozvuzgvanj louzce riz lizsij.



▲ Ranzlaeuz moq ndoj youq ndaw raemhfaex.

Lingzyinz Yen Swcwnz Cin Lungjduih Cunh youq mwh haenqrenz hwnjguh lajmbanj moq seveicujyi, vuenhmoq naemjsiengi, naek youq comz rengz guh gezgou canjnieb diuzcwnj, unglaeb canjyez daegsaek, daezsang gij naengzganq baenz fouq vunzlai baengh gohgi bae demsou gwnzde bae, laebbaenz le ndaem gosangh ciengx nonsei, goywdoj, dajciengx, okrog dajgoeng, dangjyenz doxbang 5 aen hezvei canjnieb neix, hwnjfat cungj ginghci "gehrin" aeu ndaem gosangh ciengx nonsei guhcawj, ndaem goyw guhbouj neix, aeundaer ginghci yauiyiz ndei. Geij bi gvaqbae, goengqbya bienq heu lo, mbanj bienq gyaeunde lo, vunzmbanj bienq fouq lo, hawj vunzlai dwen haenh mbouj dingz.

Lungjduih Cunh dieg youq ndaw runghlaeg diegbya, vunz dangdieg aeu coenz fwen "Bya sang rin hix lai, ok dou ngaiz bin lingq; dieg fouz sam cik bingz, bouxsien cingh ngauz gyaeuj" neix daeuj dajbeij gij dieg yaezrwix gizneix. Gungz cix naemj fouq. Gyoengq vunzmbanj youq cunh dangjihbu dazyinx lajde, caezsim haenqrenz buek guh, aeu goengrenz bonjfaenh baenz yamq baenz yamq gajbienq yiengh gungzndoq, ndaej gvaq gij saedceij angqyangz

vuenyungz haenx.

Vunz Lungjduih gajbienq yiengh gungzndoq byaij yamq daih'it dwg aeu naz ndei reih ndei ndaem gosangh. Geij bi gonq, cunhchisuh Vuz Denhlaiz nyinhnaeuz ndaw mbanj ndaem gosangh ndaej hwnjfat, couh gag sawq ndaem le 11 moux gosangh, bi haenx ciengx nonsei 16 dungh, souhaeuj 1.5 fanh maenz, bi daihngaih vunzlai couh riengz guh hwnjdaej lo, mbouj daengz song bi seizgan ndaw mbanj ndaem gosangh 3000 lai moux, baengh ndaem gosangh ciengx nonsei bingzyaenz moix bi moix ranz demsou 5000 maenz doxhwnj, baenz hongsaeh daeuz daengx mbanj. Yamh daihngaih dwg ciengx mou, youq mwh hwnjguh lajmbanj moq, vunzmbanj couh guh daengz bouxvunz caeuq doenghduz faengek, bae giz liz ranzyouq haemq gyae haenx guh rienghmou, banh ciengzciengxmou, aeu mbawmaenz, byaekheu caeuq raemz daeuj gueng mou, mou caengz maj hung couh miz lauxbanj dingh cawx, gai daengz Gvangicouh daengj singzhung, vunzlai caemh demlai le souhaeuj. Yamq daihsam dwg ungganq goywdoj, gwnz bya seiqhenz mbanj Lungjduih miz haujlai gocibdaihgoenglaux doenghgij

goywdoj neix, ndaw cunh youh roengzbiu ceng ndaej ndaw yienh 2000 moux hanghmoeg ungganq gocibdaihgoenglaux, riengzlaeng cuj-ciz, sonyinx vunzmbanj youq gwnz bya gaglouz ndaemganq, doengjit sougai, demlai souhaeuj, seizneix gij byafwz Mbanjrungbiz, Mbanjbit-doengh daengj 5 aen mbanj ndaw cunh gaenq baenz Guengjsae cibdaihgoenglaux cwx yenzgiu gihdi. Ndaew cunh lij hwnjfat ndaemganq gosiaux (铁皮石斛), laebbaenz gosiaux nungzminz ciennieb hoz-cozse, lij laebbaenz le Cangzswng Hsenhcauj Swngvuz Gohgi Gaihfaiz Youjhan Gunghsw, banh le ndaemganq gihdi, youz gunghsw bau ungganq miuzyw caeuq son ndaemganq gisuz, vunzmbanj bau ndaem, gunghsw bau soucawx gyagoeng, moix bi ungganq miuzyw mauhvaq 400 fanh go, ndaej gai daengz Yizbwnj, Majlaizsihya bae, vunzmbanj youh demlai le yiengh souhaeuj ndeu.

Vunz Lungjduih baengh rengz bonjfaenh byaij ok diuz roen vut gungz baenz fouq ndeu, saedceij bi beij bi ndei, ndaw swcigih raeuz caemh miz haujlai gihcwnz cujiz daiq dangjyenz bae habsib aeu gingniemh.




▲ Aen gihdi ndaemganq gosiaux ndaw mbanj.



▲ Vunzmbanj miz dieg beizyin caeuq ranz yawj saw.



▲ Mbanj moq yiengh gyaeunde.



▲ Naj ranz gomak lai.



▲ Vunzmbanj mbaet mbaw gosangh gueng nonsei.



▲ Aen gihdi ungganq miuzyw cibdaihgoenglaux.